

რეგისტრაციის დღიდან ხელის დაჭერით,
თქვენ ადასტურებთ, რომ გაეცანით და დაეთანხმეთ
წინამდებარე ხელშეკრულებას.

ნებისმიერ დაინტერესებულ ფიზიკურ და იურიდიულ პირს, რომელსაც სურს განკარგოს
ქონება, უფლება აქვს ვებ-გვერდზე www.eauction.ge განათავსოს აღნიშნული ქონება, ამისათვის
ის უნდა გაეცნოს და დაეთანხმოს ხელშეკრულების პირობებს.

ვებ-გვერდის გამოყენებამდე, გთხოვთ გულდასმით გაეცნოთ აღნიშნულ პირობებს.
რეგისტრაციის განხორციელების შემდეგ, თქვენ ავტომატურად მოექცევით ხელშეკრულების
მოქმედების ფარგლებში, რაც ნიშნავს იმას, რომ თქვენ განაცხადით თანხმობა იმაზე, რომ
ხელშეკრულების მოქმედება გავრცელდეს თქვენზე.

წინამდებარე ხელშეკრულების მხარეებს წარმოადგენენ საჯარო სამართლის იურიდიული პირი
„საქართველოს ფინანსთა სამინისტროს მომსახურების სააგენტო“ (შემდგომში – სააგენტო) და
ნებისმიერი ფიზიკური და იურიდიული პირი (შემდგომში - პირი), რომელიც განკარგავს
ქონებას ამ ვებ-გვერდის მეშვეობით.

მუხლი 1. ხელშეკრულების საგანი

- 1.1. წინამდებარე ხელშეკრულება, ვებ-გვერდზე შესაბამისი ინფორმაციის განთავსების (შესაბამისი
ვებ-გვერდის შევსების) შედეგად, შესაძლებლობას აძლევს პირს განკარგოს ქონება
ინტერნეტაუქციონის/ინტერნეტ მაღაზიის, ასევე საჯარო აუქციონის თაობაზე ინფორმაციის
განთავსებისა და სურვილის შემთხვევაში, საჯარო აუქციონის ჩატარების მეშვეობით.
- 1.2. ამ ხელშეკრულებით გათვალისწინებული უფლებების გამოყენების მიზნებისთვის, ქონება უნდა
იყოს პირის საკუთრება, ან აღნიშნულ პირს უნდა გააჩნდეს ქონების განკარგვის კანონიერი
უფლებამოსილება.

მუხლი 2. რეგისტრაციის პირობები

- 2.1. ქონების განთავსებამდე, პირი ვალდებულია გაიაროს რეგისტრაცია ვებ-გვერდზე.
- 2.2. ვებ-გვერდზე რეგისტრაცია შეუძლია საქართველოს მოქალაქე ნებისმიერ ფიზიკურ პირს და
იურიდიულ პირს.
- 2.3. ფიზიკური პირი, რომელსაც შეუსრულდა 18 წელი და „საქართველოს სამოქალაქო კოდექსის“
შესაბამისად არის ქმედუნარიანი, სარეგისტრაციო ფორმაში ავსებს: „პირადი ნომრის“ (პირადობის
მოწმობის 11 ნიშნა პირადი ნომერი), „გვარის“ და „სახელის“ ველებს, რის შემდეგაც სისტემის მიერ,
ავტომატურად ხდება სამოქალაქო რეესტრის მონაცემთა ბაზასთან ინფორმაციის გადამოწმება და
მონაცემების უტყუარობის შემთხვევაში, რეგისტრაციის შემდგომ ეტაპზე დაშვება, სადაც ფიზიკური

პირის მიერ ივსება სარეგისტრაციო ფორმის დარჩენილი ველები: „მომხმარებლის სახელი“, „პაროლი“, „საცხოვრებელი მისამართი“, „ელექტრონული ფოსტის მისამართი“ და „მობილური ტელეფონის ნომერი“.

2.4. იურიდიული პირი სარეგისტრაციო ფორმაში ავსებს: „საიდენტიფიკაციო ნომრის“, „ორგანიზაციულ-სამართლებრივი ფორმის“ და „დასახელების“ ველებს, რის შემდეგაც სისტემის მიერ ავტომატურად ხდება სახელმწიფო რეგისტრაციის მონაცემთა ბაზასთან (მეწარმეთა და არასამეწარმეო (არაკომერციული) იურიდიული პირების რეესტრთან) ინფორმაციის გადამოწმება და მონაცემების უტყუარობის შემთხვევაში რეგისტრაციის შემდგომ ეტაპზე დაშვება, სადაც იურიდიული პირის მიერ ივსება სარეგისტრაციო ფორმის დარჩენილი ველები: „მომხმარებლის დასახელება“, „პაროლი“, „მისამართი“, „ელექტრონული ფოსტის მისამართი“ და „მობილური ტელეფონის ნომერი“.

2.5. აღნიშნულის შემდგომ მომხმარებელი „დადასტურების ელემენტის“ მეშვეობით ეთანხმება წინამდებარე ხელშეკრულებას.

2.6. რეგისტრაციის დასკვნით ეტაპზე სარეგისტრაციო ფორმაში მითითებულ მობილური ტელეფონის ნომერზე სისტემა აგზავნის აქტივაციის კოდს, ხოლო ელექტრონული ფოსტის მისამართზე ვებ-გვერდის ბმულს. აღნიშნული ბმულის მომხმარებლის მიერ ბროუზერში გახსნის და აქტივაციის კოდის შეყვანით სრულდება რეგისტრაციის პროცესი.

მუხლი 3. ავტორიზაცია

ვებ-ვერდზე დარეგისტრირებული მომხმარებლისათვის ავტორიზაცია შესაძლებელია შესაბამის ფორმაში „მომხმარებლის სახელის“ („დასახელების“) და „პაროლის“ შეყვანის გზით.

მუხლი 4. პირის მიერ ქონების განკარგვა

4.1. ავტორიზაციის შემდგომ, პირის ქონების განკარგვის ხელშეწყობა ხორციელდება შემდეგი ფორმებით:

4.1.1. ინტერნეტაუქციონის ფორმით;

4.1.2. ინტერნეტმაღაზიის ფორმით;

4.1.3. აუქციონის ჩატარების შესახებ ინფორმაციული ხასიათის განცხადების განთავსებით;

4.1.4. ქონების ინტერნეტმაღაზიის მეშვეობით რეალიზაცია შესაძლებლობით „იყიდე ახლავე“ (ე.წ. Buy It Now).

4.2. ქონების განკარგვაში იგულისხმება ქონების რეალიზაცია/პრივატიზება, სარგებლობის/მართვის უფლებით გაცემა.

4.3. ამ მუხლის 4.1.4. ქვეპუნქტით სარგებლობის შემთხვევაში, ქონების რეალიზებით დაინტერესებული პირი ლოტის რეგისტრაციის დროს თავად ადგენს ე.წ. „Buy It Now“-ს მეშვეობით ქონების სარეალიზაციო ღირებულებას, რომლის ოდენობაც უნდა აღემატებოდეს შეთავაზებულ საწყის ფასს დამატებული ბიჯის ოდენობას. ინტერნეტაუქციონის მიმდინარეობისას მომხმარებელს ეძლევა საშუალება, ლოტზე საგარანტიო თანხის წინასწარ გადახდის შემდეგ, შეიძინოს ქონება დაუყონებლივ „იყიდე ახლავე“-ს (ე.წ. „Buy It Now“) დადგენილ ფასად და შესაბამისად არ დაელოდოს ინტერნეტაუქციონის დასრულებას.

4.3.1. „იყიდე ახლავე“/“BuyItNow“-ს ღილაკის ფუნქცია იზღუდება თუ:

4.3.1.1. ინტერნეტაუქციონის თანხა გადააჭარბებს ე.წ. „Buy It Now“-ს მეშვეობით ქონების შეძენისთვის დაწესებულ თანხას;

4.3.1.2. აუქციონის დასრულებამდე 3 საათით ადრე;

4.4. პირი თავად ახორციელებს განსაკარგი ქონების თაობაზე ინფორმაციის ვებ-გვერდზე ატვირთვას, შესაბამისი ველების შევსების გზით. თავდაპირველად კი მან უნდა მონიშნოს, ქონების განკარგვის ფორმა – ინტერნეტაუქციონი/ინტერნეტმაღაზია, საჯარო აუქციონის თაობაზე ინფორმაციის განთავსება და ქონების ტიპი – მოძრავი/უძრავი.

4.5. შესაბამისი ველების შევსების შემდეგ, პირი ვებ-გვერდზე ტვირთავს ფოტოსურათებს, რომელიც არ უნდა შეიცავდეს შეურაცხმყოფელ გამოსახულებას, სარეკლამო ხასიათის ინფორმაციას, პოლიტიკურ, თუ რელიგიურ მოწოდებებს.

4.6. ურთიერთობა პირსა და აუქციონში გამარჯვებულს/აუქციონში მონაწილეს შორის რეგულირდება სააგენტოსგან დამოუკიდებლად.

4.7. პირი ერთპიროვნულად არის პასუხისმგებელი მის მიერ განთავსებული ინფორმაციის უტყუარობაზე.

მუხლი 5. მომსახურების საფასურის გადახდა

5.1. სააგენტოს მიერ გასაწევი მომსახურების საფასური განისაზღვრება საქართველოს მთავრობის დადგენილებით (დანართი #1).

5.2. შესაბამისი ველების შევსებისა და განაცხადის რეგისტრაციის შემდეგ, პირი მომსახურების საფასურს იხდის ონლაინ რეჟიმში ან www.eauction.ge - ს საგადახდო სისტემის მეშვეობით. ამის შემდეგ მას უკვე ექნება საშუალება (✓ღილაკით დადასტურებაზე გაგზავნა) განაცხადი გადააგზავნოს ინტერნეტაუქციონის ადმინისტრატორთან, საიდანაც უკვე ადმინისტრატორის მიერ დადასტურების შემდეგ, განხორციელდება განაცხადის ვებ-გვერდზე განთავსება.

5.3. მომსახურების საფასური გადაიხდევენება წინასწარ, გარდა ამ მუხლის 5.4 და 5.5 პუნქტებით გათვალისწინებული შემთხვევებისა.

5.4. „სახელმწიფო შესყიდვების შესახებ“ საქართველოს კანონით გათვალისწინებულ ორგანიზაციებს, სააგენტოსთან შეთანხმებით, უფლება აქვთ წლიური მომსახურების გაწევის შემთხვევებში, მომსახურების საფასური გადაიხადონ მომსახურების პროცედურების დასრულების შემდეგ, თვეში ერთხელ, ყოველი თვის დასრულებიდან არაუგვიანეს 15 კალენდარული დღისა.

5.5. კერძო სამართლის იურიდიული პირების შემთხვევაში, მთელი ქონების საბოლოო სარეალიზაციო/სარგებლობის უფლებით გადასაცემი ღირებულების ამ ხელშეკრულების დანართი №1-ის („დაინტერესებული ფიზიკური და იურიდიული პირების ქონების განკარგვის ხელშეწყობისას საჯარო სამართლის იურიდიული პირის – საქართველოს ფინანსთა სამინისტროს მომსახურების სააგენტოს მიერ მომსახურების გაწევის წესის, მომსახურების სახეებისა და საფასურის ოდენობის დამტკიცების შესახებ“ საქართველოს მთავრობის 2012 წლის 12 აპრილის №141 დადგენილება) მე-2 დანართის (დაინტერესებული ფიზიკური და იურიდიული პირების ქონების განკარგვის ხელშეწყობისას საჯარო სამართლის იურიდიული პირის – საქართველოს ფინანსთა სამინისტროს მომსახურების სააგენტოს მიერ გასაწევი მომსახურების სახეები და საფასურის ოდენობა) მე-3 გრაფით გათვალისწინებული 1% გადაიხდება

ინტერნეტაუქციონში გამარჯვებულის გამოვლენის შემთხვევაში, ინტერნეტაუქციონის პროცედურების დასრულებიდან არაუგვიანეს 30 კალენდარული დღისა.

5.6. ანგარიშსწორება ხორციელდება საქართველოს კანონმდებლობით დადგენილი წესით.

5.7. მომსახურების საფასური მოიცავს საქართველოს კანონმდებლობით დადგენილ ყველა გადასახადს და ირიცხება სააგენტოს ანგარიშზე.

მუხლი 6. გადახდილი მომსახურების საფასურის დაბრუნების წესი

6.1. თუ მომსახურების საფასური გადახდილია დადგენილ საფასურის განაკვეთზე მეტი ოდენობით, საფასურის გადამხდელს დაუბრუნდება სხვაობა მის მიერ გადახდილ თანხასა და დადგენილ საფასურის განაკვეთს შორის. საფასურის გადამხდელის მოთხოვნით, სააგენტო უფლებამოსილია ზედმეტად ან წინასწარ გადახდილი თანხა ჩათვალოს სხვა მომსახურების ანგარიშში.

6.2. გადახდილი საფასური სრულად ბრუნდება, თუ:

ა) სააგენტო, კანონიერი საფუძვლის არსებობისას, უარს აცხადებს მომსახურების განხორციელებაზე;

ბ) დაინტერესებული პირი სააგენტოს მიერ მომსახურების გაწევის დაწყებამდე წერილობით განაცხადებს უარს მომსახურების მიღებაზე;

გ) სააგენტომ მომსახურება არ განახორციელა დადგენილ ვადაში.

6.3. ამ მუხლის 6.2 პუნქტის „ა“ და „გ“ ქვეპუნქტებით გათვალისწინებულ შემთხვევებში, სააგენტო ორი სამუშაო დღის ვადაში აცნობებს დაინტერესებულ პირს მომსახურების განხორციელების შეუძლებლობის შესახებ და სრულად უბრუნებს გადახდილ მომსახურების საფასურს.

6.4. ამ მუხლის 6.2 პუნქტის „ბ“ ქვეპუნქტით გათვალისწინებულ შემთხვევაში, გადახდილი მომსახურების საფასურის სრულად დაბრუნება ხორციელდება დაინტერესებული პირის განცხადების საფუძველზე. განცხადება წარმოდგენილ უნდა იქნეს მომსახურების საფასურის გადახდიდან 60 კალენდარული დღის ვადაში. ამ ვადის გასვლის შემდეგ გადახდილი საფასური დაბრუნებას არ ექვემდებარება.

6.5. ამ მუხლის 6.3 და 6.4 პუნქტებით გათვალისწინებულ შემთხვევებში დაინტერესებული პირისათვის მის მიერ გადახდილი მომსახურების საფასურის დაბრუნება ხდება 10 კალენდარული დღის ვადაში.

მუხლი 7. მხარეთა უფლებები და ვალდებულებები

7.1. სააგენტო უფლებამოსილია:

7.1.1. შეცვალოს ხელშეკრულების პირობები, ვებ-გვერდზე ქონების განთავსების წესი ან სხვა პირობები ნებისმიერ დროს. ამ ცვლილებას/ცვლილებებს ძალა ექნება მას შემდეგ, რაც ისინი განთავსდება ვებ-გვერდზე;

7.1.2. შეწყვიტოს ნებისმიერი მომსახურება ტექნიკური პრობლემის, რაიმე შეცდომის, უზუსტობის, პირის მხრიდან უკანონო მოქმედებების განხორციელების ან სხვა მიზეზების გამო, რომელმაც შეიძლება ზიანი მიყენოს ვებ-გვერდს ან თვითონ სააგენტოს;

7.1.3. შეაჩეროს ან შეწყვიტოს პირის რეგისტრაცია და ვებ-გვერდზე ავტორიზაცია, თუ ჩათვლის, რომ ის არასწორად მოქმედებს;

7.1.4. გააკონტროლოს ყველა მოქმედება პირის მხრიდან და რაიმე დარღვევის აღმოჩენის შემთხვევაში მიიღოს შესაბამისი ზომები;

7.1.5. ვებგვერდზე განთავსებულ განაცხადში შეიტანოს გრამატიკული შესწორებები, რომელმაც არ უნდა გამოიწვიოს განაცხადის ტექსტის შინაარსის ცვლილება.

7.2. სააგენტო ვალდებულია:

7.2.1. დაიცვას ხელშეკრულების პირობები.

7.3. პირი უფლებამოსილია:

7.3.1. განათავსოს ქონება ვებ-გვერდზე;

7.3.2. ნებისმიერ დროს განაახლოს თავისი პირადი მონაცემები.

7.4. პირი ვალდებულია:

7.4.1. გადაიხადოს მომსახურების ღირებულება;

7.4.2. ვებ-გვერდზე განათავსოს სრულყოფილი ინფორმაცია განსაკარგი ქონების თაობაზე;

7.4.3. არ შეიყვანოს შეცდომაში დაინტერესებული პირი მცდარი ან არასწორი ინფორმაციის გამოქვეყნების გზით;

7.4.4. ვებ-გვერდზე არ განათავსოს რაიმე სახის შეურაცხმყოფელი ინფორმაცია, ან ისეთი სახის ინფორმაცია, რომელმაც შეიძლება იმოქმედოს ვებ-გვერდის პრესტიჟზე;

7.4.5. არ განათავსოს ინფორმაცია, რომელშიც იქნება რაიმე სახის მუქარა ან ცილისწამება, კომერციული საიდუმლო, ან, რომელიც იქნება ღირსებისა და რეპუტაციის შეურაცხმყოფელი, ასევე ინფორმაცია, რომელიც შეიძლება საზიანო იყოს საზოგადოებისთვის;

7.4.6. არ განათავსოს სარეკლამო სახის ინფორმაცია, ან ინფორმაცია, რომელმაც შესაძლოა ზიანი მიაყენოს ვებ-გვერდს;

7.4.7. არ გაავრცელოს ნებისმიერი არაოფიციალური ინფორმაცია, კომპიუტერული ვირუსი, სპამი;

7.4.8. არ დაარღვიოს საქართველოს მოქმედი კანონმდებლობა და ამ ხელშეკრულების პირობები;

7.4.9. არ გადასცეს ვებ-გვერდის პირადი ანგარიში სხვა მომხმარებელს;

7.4.10. თუ საქართველოს კანონმდებლობით იკრძალება რაიმე სახის ქონების განკარგვა, ვებ-გვერდზე არ განათავსოს მსგავსი სახის ქონება;

7.4.11. თუ ქონების განკარგვისთვის საჭიროა რაიმე სახის ნებართვის/ლიცენზიის აღება, უზრუნველყოს აღნიშნული ნებართვის/ლიცენზიის მოძიება. თუ პირი განკარგავს ასეთი სახის ქონებას, სააგენტო უფლებამოსილია ჩათვალოს, რომ მას აქვს შესაბამისი ნებართვა/ლიცენზია.

7.4.12. პირს ეკრძალება ინტერნეტაუქციონის პერიოდში რაიმე სახით ფასების ხელოვნურად გაზრდა.

7.5. სააგენტო იტოვებს უფლებას, პირის მიერ მნიშვნელოვანი დარღვევ(ებ)ის შემთხვევაში, გააუქმოს პირის მიერ განთავსებული ინფორმაცია და/ან პირის ანგარიში ვებ-გვერდზე.

8. ფორს-მაჟორი

ხელშეკრულების პირობების დარღვევა ფორს-მაჟორული გარემოებების დადგომის გამო არ იქნება განხილული როგორც ხელშეკრულების პირობების შეუსრულებლობა ან დარღვევა და არ გამოიწვევს საჯარიმო სანქციების გამოყენებას. ვალდებულებების შესრულების ვადა გადაიწვეს შესაბამისი დროით, ფორსმაჟორულ გარემოებათა დასრულების შემდეგ.

მუხლი 9. მხარეთა პასუხისმგებლობა

- 9.1. პირი პასუხისმგებელია მის მიერ განთავსებულ ნებისმიერი სახის ინფორმაციაზე.
- 9.2. სააგენტო პასუხს არ აგებს განსაკარგი ქონების კანონიერებასა, თუ მართლზომიერებაზე.
- 9.3. სააგენტო არ მონაწილეობს პირსა და ქონების შემძენს/სარგებლობაში მიმღებს შორის წარმოშობილ ურთიერთობებში.
- 9.4. სააგენტო არ აგებს პასუხს ვებ-გვერდის ფუნქციონირების დროებით შეწყვეტის ან შეფერხების გამო, თუმცა იღებს ყველანაირ ზომას ასეთი შეფერხებების თავიდან ასაცილებლად.
- 9.5. წინამდებარე ხელშეკრულების მიხედვით აღებული ვალდებულებების შეუსრულებლობის ან არასათანადოდ შესრულების შემთხვევაში მიყენებული ზიანისთვის მხარეები პასუხს აგებენ საქართველოს კანონმდებლობის შესაბამისად.

მუხლი 10. კონფიდენციალურობა

- 10.1. პირი პასუხს აგებს მისი სახელით და არჩეული პაროლით განხორციელებულ ნებისმიერ ქმედებაზე.
- 10.2. აკრძალულია ამ ხელშეკრულების მე-2 მუხლში მოცემული პარამეტრების გაყალბება და ექვემდებარება პასუხისმგებლობას მოქმედი კანონმდებლობის შესაბამისად.
- 10.3. პირი ვალდებულია არ გაამჟღავნოს ინფორმაცია თავისი პაროლის შესახებ. თუ სხვადასხვა მიზეზის გამო პაროლი ცნობილი გახდება სხვა პირისთვის, პირმა ის უნდა შეცვალოს.

მუხლი 11. მოქმედი კანონმდებლობა

- 11.1. ამ ხელშეკრულებით გათვალისწინებულ ურთიერთობებზე მოქმედებს საქართველოს კანონმდებლობა.

11.2. ნებისმიერი უთანხმოება, რომელიც შეიძლება წარმოიშვას მხარეთა შორის, უნდა გადაწყდეს მოლაპარაკების გზით, წინააღმდეგ შემთხვევაში მხარეები მიმართავენ სასამართლოს.

მუხლი 12. დამატებითი პირობები

სააგენტოს მხრიდან პირისთვის ნებისმიერი ინფორმაციის მიწოდება ხორციელდება მის ელექტრონულ მისამართზე ან მობილური ტელეფონის ნომერზე შეტყობინების გაგზავნის სახით, რაც ჩაითვლება ინფორმაციის ოფიციალურ შეტყობინებად.

დანართი #1

საქართველოს მთავრობის დადგენილება №141 2012 წლის 12 აპრილი ქ. თბილისი

დაინტერესებული ფიზიკური და იურიდიული პირების ქონების განკარგვის ხელშეწყობისას საჯარო სამართლის იურიდიული პირის – საქართველოს ფინანსთა სამინისტროს მომსახურების სააგენტოს მიერ მომსახურების გაწევის წესის, მომსახურების სახეებისა და საფასურის ოდენობის დამტკიცების შესახებ

მუხლი 1. „სახელმწიფო ქონების შესახებ“ საქართველოს კანონის 25-ე მუხლის მე-4 პუნქტის შესაბამისად, დამტკიცდეს თანდართული:

1. „დაინტერესებული ფიზიკური და იურიდიული პირების ქონების განკარგვის ხელშეწყობისას საჯარო სამართლის იურიდიული პირის – საქართველოს ფინანსთა სამინისტროს მომსახურების სააგენტოს მიერ მომსახურების გაწევის წესი“ (დანართი №1).

2. „დაინტერესებული ფიზიკური და იურიდიული პირების ქონების განკარგვის ხელშეწყობისას საჯარო სამართლის იურიდიული პირის – საქართველოს ფინანსთა სამინისტროს მომსახურების სააგენტოს მიერ გასაწევი მომსახურების სახეები და საფასურის ოდენობა“ (დანართი №2).

მუხლი 2. დადგენილება ამოქმედდეს გამოქვეყნებისთანავე.

პრემიერ-მინისტრი

ნ. გილაური

დაინტერესებული ფიზიკური და იურიდიული პირების ქონების განკარგვის ხელშეწყობისას საჯარო სამართლის იურიდიული პირის – საქართველოს ფინანსთა სამინისტროს მომსახურების სააგენტოს მიერ მომსახურების გაწევის წესი

მუხლი 1. ზოგადი დებულებები

1. ეს წესი განსაზღვრავს საჯარო სამართლის იურიდიული პირის – საქართველოს ფინანსთა სამინისტროს მომსახურების სააგენტოს (შემდგომში – სააგენტო) მიერ დაინტერესებული ფიზიკური და იურიდიული პირების (შემდგომში – დაინტერესებული პირი) ქონების განკარგვის ხელშეწყობისას მომსახურების გაწევის ძირითად პრინციპებს.

2. სააგენტო დაინტერესებული პირის ქონების განკარგვის ხელშეწყობას ახორციელებს ქონების რეალიზაციისას, პრივატიზებისას ან სარგებლობის უფლებით გადაცემისას.

მუხლი 2. დაინტერესებული პირების ქონების განკარგვის ხელშეწყობა

1. დაინტერესებული პირი, ქონების განკარგვის ხელშეწყობის მიზნით სააგენტოს მომსახურებით სარგებლობის სურვილის შემთხვევაში, ელექტრონული ან მატერიალური განაცხადით მიმართავს სააგენტოს. ელექტრონული განაცხადის შემთხვევაში, დაინტერესებული პირი სააგენტოს მიმართავს ვებგვერდის www.eauction.ge-ის საშუალებით.

2. დაინტერესებული პირი უფლებამოსილია თავად განათავსოს განცხადება ქონების განკარგვის შესახებ ვებგვერდზე www.eauction.ge.

3. სააგენტო, დაინტერესებული პირის ელექტრონული/მატერიალური განაცხადის ან განთავსებული განცხადების პირობების შესაბამისად, უზრუნველყოფს ქონების განკარგვის პროცედურების განხორციელებას.

მუხლი 3. სააგენტოს მიერ მატერიალური ან/და ელექტრონული დოკუმენტის გამოყენება

ამ წესით განსაზღვრული უფლებამოსილებების განხორციელებისას, სააგენტოს უფლება აქვს მატერიალური ან/და ელექტრონული დოკუმენტის სახით შექმნას, მიიღოს, შეინახოს ნებისმიერი დოკუმენტი (მათ შორის, საარქივო მასალა), შეიტანოს მონაცემებში ცვლილებები ან შესწორებები, გასცეს (გამოსცეს) ნებისმიერი დოკუმენტი ან/და ინფორმაცია, რომელსაც შეიძლება სამართლებრივი შედეგები მოჰყვეს, აგრეთვე გამოიყენოს ელექტრონული დოკუმენტბრუნვის სისტემა, მართვის ერთიანი ავტომატური საშუალებები, ელექტრონული ხელმოწერა, ელექტრონული ან/და ტექნიკური საშუალებით ხელმოწერა. ელექტრონულ დოკუმენტს და მის ამონაბეჭდს აქვს ისეთივე იურიდიული ძალა, როგორც მატერიალურ დოკუმენტს. დოკუმენტზე ელექტრონული ხელმოწერა, აგრეთვე ელექტრონული ან/და ტექნიკური საშუალებით ხელმოწერა ითვლება მატერიალურ დოკუმენტზე პირადი ხელმოწერის თანაბარი იურიდიული ძალის მქონედ.

მუხლი 4. მომსახურების ფორმები

დაინტერესებული პირის ქონების განკარგვის ხელშეწყობა ხორციელდება შემდეგი ფორმებით:

- ა) აუქციონის (ინტერნეტაუქციონი, საჯარო აუქციონი) ფორმით;
- ბ) ინტერნეტმაღაზიის ფორმით;
- გ) ვებგვერდზე www.eauction.ge აუქციონის ჩატარების შესახებ ინფორმაციული ხასიათის განცხადების განთავსებით. (24.05.2012 N 191)
- დ) ქონების ინტერნეტაუქციონის მეშვეობით, რეალიზაცია შესაძლებლობით „იყიდე ახლავე“ (ე.წ. „Buy It Now“). (5.03.2015 N87)

მუხლი 5. მომსახურების საფასურის გადახდა

1. სააგენტოს მიერ გასაწევი მომსახურების საფასურის გადახდა მოხდება წინასწარ, გარდა ამ მუხლის მე-2, 2¹ და მე-6 პუნქტებით გათვალისწინებული შემთხვევებისა. (5.03.2015 N87)

2. კერძო სამართლის იურიდიული პირების შემთხვევაში, მთელი ქონების საბოლოო სარეალიზაციო/სარგებლობის უფლებით გადასაცემი ღირებულების №2 დანართის მე-3 გრაფით გათვალისწინებული პროცენტი გადაიხდება ინტერნეტაუქციონში გამარჯვებულის გამოვლენის შემთხვევაში, ინტერნეტაუქციონის პროცედურების დასრულებიდან არა უგვიანეს 30 კალენდარული დღისა. (5.03.2015 N87)

2¹. კერძო სამართლის იურიდიული პირისათვის საჯარო აუქციონის ჩატარების შემთხვევაში, მთელი ქონების საბოლოო სარეალიზაციო/სარგებლობის უფლებით გადასაცემი ღირებულების №2 დანართის მე-6 გრაფით გათვალისწინებული პროცენტი გადაიხდება საჯარო აუქციონში გამარჯვებულის გამოვლენის შემთხვევაში, აუქციონის დასრულების დღიდან არა უგვიანეს 30 კალენდარული დღისა. (5.03.2015 N87)

3. ანგარიშსწორება ხორციელდება საქართველოს კანონმდებლობით დადგენილი წესით.

4. მომსახურების საფასური მოიცავს საქართველოს კანონმდებლობით დადგენილ ყველა გადასახადს და ირიცხება სააგენტოს ანგარიშზე.

5. მომსახურების საფასურის გადახდისაგან თავისუფლდება საქართველოს ფინანსთა სამინისტრო.

5¹. საქართველოს უმაღლესი საგანმანათლებლო დაწესებულებების სტუდენტებისათვის ამ დადგენილების №2 დანართის პირველი, მე-4, მე-7 და მე-8 გრაფებით გათვალისწინებული მომსახურების გაწევისათვის დადგენილი საფასურის ოდენობები მცირდება 50%-ით. (30/05/2012 N 196)

6. „სახელმწიფო შესყიდვების შესახებ“ საქართველოს კანონით გათვალისწინებულ ორგანიზაციებს, სააგენტოსთან შეთანხმებით, უფლება აქვთ წლიური მომსახურების გაწევის შემთხვევებში, მომსახურების საფასური გადაიხადონ მომსახურების პროცედურების დასრულების შემდეგ, თვეში ერთხელ, ყოველი თვის დასრულებიდან არაუგვიანეს 15 კალენდარული დღისა. (9.07.2013 N 171)

მუხლი 6. გადახდილი მომსახურების საფასურის დაბრუნების წესი

1. თუ მომსახურების საფასური გადახდილია დადგენილ საფასურის განაკვეთზე მეტი ოდენობით, საფასურის გადამხდელს დაუბრუნდება სხვაობა მის მიერ გადახდილ თანხასა და დადგენილ საფასურის განაკვეთს შორის. საფასურის გადამხდელის მოთხოვნით სააგენტო უფლებამოსილია, ზედმეტად ან წინასწარ გადახდილი თანხა ჩათვალოს სხვა მომსახურების ანგარიშში.

2. გადახდილი საფასური სრულად ბრუნდება, თუ:

ა) სააგენტო, კანონიერი საფუძვლის არსებობისას, უარს აცხადებს მომსახურების განხორციელების თაობაზე;

ბ) დაინტერესებული პირი სააგენტოს მიერ მომსახურების გაწევის დაწყებამდე წერილობით განაცხადებს უარს მომსახურების მიღების თაობაზე;

გ) სააგენტომ მომსახურება არ განახორციელა დადგენილ ვადაში.

3. ამ მუხლის მე-2 პუნქტის „ა“ და „ბ“ ქვეპუნქტებით გათვალისწინებულ შემთხვევებში, სააგენტო ორი სამუშაო დღის ვადაში აცნობებს დაინტერესებულ პირს მომსახურების განხორციელების შეუძლებლობის შესახებ და სრულად უბრუნებს გადახდილ მომსახურების საფასურს.

4. ამ მუხლის მე-2 პუნქტის „ბ“ ქვეპუნქტით გათვალისწინებულ შემთხვევაში, გადახდილი მომსახურების საფასურის სრულად დაბრუნება ხორციელდება დაინტერესებული პირის განცხადების საფუძველზე. განცხადება წარდგენილი უნდა იქნეს მომსახურების საფასურის გადახდიდან 60 კალენდარულ დღეში. ამ ვადის გასვლის შემდეგ გადახდილი საფასური დაბრუნებას არ ექვემდებარება.

5. ამ მუხლის მე-3 და მე-4 პუნქტებით გათვალისწინებულ შემთხვევებში, დაინტერესებული პირისათვის მის მიერ გადახდილი მომსახურების საფასურის დაბრუნება ხდება 10 კალენდარულ დღეში.

დანართი №2

დაინტერესებული ფიზიკური და იურიდიული პირების ქონების განკარგვის ხელშეწყობისას საჯარო სამართლის იურიდიული პირის – საქართველოს ფინანსთა სამინისტროს მომსახურების სააგენტოს მიერ გასაწევი მომსახურების სახეები და საფასურის ოდენობა

N	მომსახურების სახე	ერთჯერადი მომსახურების საფასური (ერთი ლოტი – არა უმეტეს 30 კალენდარული დღის ხანგრძლივობით)	მრავალჯერადი მომსახურების საფასური (არა უმეტეს ერთი თვის განმავლობაში)	წლიური მომსახურების საფასური
1	ფიზიკური პირისათვის ინტერნეტაუქციონის ჩატარება	3 ლარი	60 ლარი	600 ლარი

2	ადმინისტრაციული ორგანოსათვის (გარდა ამ დანართის მე-10 – მე-13 და მე-16 გრაფებით გათვალისწინებული ადმინისტრაციული ორგანოებისა), არასამეწარმეო (არაკომერციული) იურიდიული პირისათვის, პოლიტიკური და რელიგიური გაერთიანებებისათვის ინტერნეტაუქციონის ჩატარება (5.03.2015 N87)	50 ლარი	250 ლარი	3 000 ლარი
3	კერძო სამართლის იურიდიული პირისათვის (გარდა ამ დანართის მე-2 და მე-14 გრაფებით გათვალისწინებული კერძო სამართლის იურიდიული პირებისა), ინტერნეტაუქციონის ჩატარება (5.03.2015 N87)	100 ლარი; ინტერნეტაუქციონში გამარჯვებულის გამოვლენის შემთხვევაში ემატება მთელი ქონების საბოლოო სარეალიზაციო/სარგებლობის უფლებით გადასაცემი ღირებულების 1%	200 ლარი; ინტერნეტაუქციონში გამარჯვებულის გამოვლენის შემთხვევაში ემატება მთელი ქონების საბოლოო სარეალიზაციო/სარგებლობის უფლებით გადასაცემი ღირებულების 1%	2 400 ლარი; ინტერნეტაუქციონში გამარჯვებულის გამოვლენის შემთხვევაში ემატება მთელი ქონების საბოლოო სარეალიზაციო/სარგებლობის უფლებით გადასაცემი ღირებულების
4	ფიზიკური პირისათვის აუქციონის შესახებ ვებგვერდზე ინფორმაციის განთავსება (24.05.2012 N 191)	3 ლარი	50 ლარი	500 ლარი
5	იურიდიული პირისათვის აუქციონის შესახებ ვებგვერდზე ინფორმაციის განთავსება (გარდა ამ დანართის მე-15 გრაფით გათვალისწინებული იურიდიული პირისა) (24.05.2012 N 191)	20 ლარი	120 ლარი	1 200 ლარი
6	იურიდიული პირისათვის საჯარო აუქციონის შესახებ ვებგვერდზე ინფორმაციის განთავსება და საჯარო აუქციონის ჩატარება ან საჯარო აუქციონის ჩატარება (5.03.2015 N87)	150 ლარი; საჯარო აუქციონში გამარჯვებულის გამოვლენის შემთხვევაში, კერძო სამართლის იურიდიული პირისთვის ემატება მთელი ქონების საბოლოო სარეალიზაციო/სარგებლობის უფლებით გადასაცემი ღირებულების 1%	450 ლარი (არა უმეტეს 10 აუქციონი); საჯარო აუქციონში გამარჯვებულის გამოვლენის შემთხვევაში, კერძო სამართლის იურიდიული პირისთვის ემატება მთელი ქონების საბოლოო სარეალიზაციო/სარგებლობის უფლებით გადასაცემი ღირებულების 1%	1 500 ლარი (არა უმეტეს 120 აუქციონი); საჯარო აუქციონში გამარჯვებულის გამოვლენის შემთხვევაში, კერძო სამართლის იურიდიული პირისთვის ემატება მთელი ქონების საბოლოო სარეალიზაციო/სარგებლობის უფლებით

				გადასაცემი ღირებულების 1%“;
7	ფიზიკური პირისათვის საჯარო აუქციონის შესახებ ვებგვერდზე ინფორმაციის განთავსება და საჯარო აუქციონის ჩატარება	100 ლარი	300 ლარი (არა უმეტეს 10 აუქციონი)	1 200 ლარი (არა უმეტეს 120 აუქციონი)
8	ფიზიკური პირისათვის ინტერნეტმაღაზიაში ქონების განთავსება	3 ლარი	20 ლარი	200 ლარი
9	იურიდიული პირისათვის ინტერნეტმაღაზიაში ქონების განთავსება	20 ლარი	170 ლარი	2 000 ლარი
10	საჯარო სამართლის იურიდიული პირის –აღსრულების ეროვნული ბიუროსთვის ინტერნეტ-აუქციონის ჩატარება; ინტერნეტმაღაზიაში ქონების განთავსება	50 ლარი	5 834 ლარი	70 000 ლარი
11	საჯარო სამართლის იურიდიული პირის –საქართველოს ნოტარიუსთა პალატისთვის ინტერნეტ-აუქციონის ჩატარება (1 ნოტარიუსი)	10 ლარი	20 ლარი	240 ლარი
12	საქართველოს ეკონომიკისა და მდგრადი განვითარების სამინისტროს სისტემაში შემავალი საჯარო სამართლის იურიდიული პირისათვის – სახელმწიფო ქონების ეროვნული სააგენტოსათვის ინტერნეტაუქციონის ჩატარება (20.09.2012 N 402 ამოქმედდეს 2012 წლის 17 სექტემბრიდან)	50 ლარი	5 834 ლარი	70 000 ლარი
13	აჭარის ავტონომიური რესპუბლიკის ფინანსთა და ეკონომიკის სამინისტრო-სათვის ინტერნეტ-აუქციონის ჩატარება	50 ლარი	2 500 ლარი	30 000 ლარი
14	შპს „სახელმწიფო მომსახურების ბიუროსათვის“ ინტერნეტაუქციონის ჩატარება	50 ლარი	417 ლარი	5 000 ლარი.
15	ქალაქ თბილისის მერიის საჯარო სამართლის იურიდიული პირის – ქონების მართვის სააგენტოსათვის აუქციონის შესახებ ვებგვერდზე ინფორმაციის განთავსება(24.05.2012 N 191)	50 ლარი	250 ლარი	3 000 ლარი
16	საჯარო სამართლის იურიდიული პირის – ბუნებრივი რესურსების სააგენტოსათვის ბუნებრივი რესურსებით სარგებლობისათვის „ლიცენზიებისა და ნებართვების შესახებ“ საქართველოს კანონით განსაზღვრული ლიცენზიების გაცემის	50 ლარი	5 834 ლარი	70 000 ლარი

	მიზნით ინტერნეტაუქციონის ჩატარება (31.08.2012 N 355)			
,17	ფიზიკური პირისათვის ქონების ინტერნეტაუქციონის მეშვეობით რეალიზაცია, შესაძლებლობით „იყიდე ახლავე“ („Buy It Now“) (5.03.2015 N87)	3 ლარი	60 ლარი	600 ლარი
18	კერძო სამართლის იურიდიული პირისათვის ქონების ინტერნეტაუქციონის მეშვეობით რეალიზაცია , შესაძლებლობით „იყიდე ახლავე“ (ე.წ. „Buy It Now“) (5.03.2015 N87)	100 ლარი; გამარჯვებულის გამოვლენის შემთხვევაში ემატება მთელი ქონების საბოლოო სარეალიზაციო ღირებულების 1%	200 ლარი; გამარჯვებ ულის გამოვლენის შემთხვევაში ემატება მთელი ქონების საბოლოო სარეალიზაციო ღირებულების 1%	2 400 ლარი; გამარჯვებულის გამოვლენის შემთხვევაში ემატება მთელი ქონების საბოლოო სარეალიზაციო ღირებულების